

Cur ch'i manca il minimum

■ (anr/fa) En la Svizra ritga ston passa 250 000 personas avair quitads ch'els nun hajan pli daners avunda per cumprar mo il pli necessari. L'Agid d'enviern emprova durant tut l'onn da cumbatter questa povradad. La Svizra tutga tar ils pajais ils pli ritgs dal mund. Cun excepziun da l'affar cun la societad aviatica naziunala prosperescha l'economia svizra e la dischoccupaziun è qua pli bassa ch'en ils blers dals auters pajais. Tuttina datti povra gliued er tar nus. Sco ch'i mussan las cifras dals uffizis responsabels vivevan 7,5 pertschient da las personas svizras en l'etad da 20 fin 59 onns a l'entschatta dal nov millenni sut l'uscheditg cunfin da povradad. Quels umans tutgan tar la gruppa dals «Working Poor». Da l'onn 2000 dumbrava quella gruppa 250 000 personas. (Dal 1990 eran quai anc «mo» 170 000 personas.) Pertutgadas èn surtut dunnas cun uffants, famiglias cun dapli da dus uffants e personas cun jobs malpajads.

27 organisaziuns chantunalas

La finamira da l'Agid d'enviern è da cumbatter la povradad en Svizra. Ella na vul remplazzar las prestaziuns da l'agid social, ma bain las cumpletar pli bain pussaivel. Gia avant lung temp è daventà l'Agid d'enviern in agid per

tut l'onn. Restà è mo il num. Per l'activitad d'agid èn respunsablas en emprima lingia las 27 organisaziuns chantunalas. Las 500 gidantras e gidanters enconuschon la situaziun en mintga chantun e pissan uschia per in agid effectiv. La recessiun ed ils midaments da l'economia mundiala han gi per consequenza che la lezia da l'Agid d'enviern resta enavant importanta. Las 27 organisaziuns chantunalas gidan cun contribuziuns finanzialas, cun bons da cumpra e cun prestaziuns materialas sco letgs, vestgadira u chalzers. En pli organischeschan ellas vacanzas gratuitas per famiglias e per dunnas cun uffants. Ils pertutgads pon profitar da la cussegliaziun ed infurmaziun da l'Agid d'enviern. En cas da catastrofes da la natira organischescha quel er aziuns d'agid. In «Agid d'enviern» chantunal datti er en Grischun.

Sustegna l'agid a sasez

Sut il num «Agid d'enviern dal Grischun» exista dapi l'onn 1995 ina fundaziun a temp indeterminà, la quala ha la sedia a Cuira. Il president dal cussegl da fundaziun è cusseglier guvernativ *Stefan Engler* e vicepresidenta l'anteriura deputada *Antoinette Piconi*. Ils deputads *Ruth Frigg*, *Fabrizio Keller* e *Martin Butzerin* èn ils ulteriurs commembers dal cussegl da

fundaziun. *Andreas Leisinger* dal servetsch social chantunal maina la gestiun da l'organisaziun caritativa. «In Agid d'enviern dovran ins en mintga cas er tar nus», manegia'l, «i dat er qua bleras famiglias che vivan gist al cunfin dal minimum d'existenza.» Ch'ellas sajan be gist capavlas da gudagnar avunda per viver, di el, «sch'i dat però ina situaziun u in'expensa extraordinara – sch'els ston pajar p. ex. il quint dal daintist, sch'i dovran ils meds finanzials per pajar in curs d'ina scolaziun supplementara u er simplamain mo per cumprar insatge per ils uffants – alura als mancan ils daners». L'avantatg da l'Agid d'enviern grischun è tenor el che l'organisaziun po gidar spert e senza burocracia. «Nus sustegnain l'agid a sasez e lavurain ensemen cun autras instituziuns socialas per garantir uschia in diever raziunal dals meds e per evitar er duplicitats en l'activitad dal sustegn.» Per che l'Agid d'enviern dal chantun Grischun possa prestar er en il futur in agid direct e nun-biocratic è el dependent da contribuziuns.

Fin ils 27 d'october 2001 rimna l'ovra d'agid da quellas contribuziuns ed engrazia a tuttas fauturas e fauteurs per lur sustegn. Las contribuziuns pon ins trametter: Agid d'enviern dal Grischun/conto postal 70-3272-2.



Per ina persona singula u per ina famiglia po in incendi muntar in donn blier pli grond che quai che l'assicuranta da bajetgs ha da pajar.

La povradad

crescha er tar nus

Sco che mussa la statistica da l'Agid d'enviern dal Grischun dals ultims trais onns ha sustegnì l'organisaziun da l'onn 1999/2000 188 personas, per gronda part famiglias. L'onn suenter eran quai 174 personas e dal 2000/2001 han survegnì 190 personas agid da l'organisaziun. Ils motifs per questas stretgas èn sco emprim in gudogn nunsuffizient (l'onn passà 23 cas), alura las consequenzas causa accidents e malatia (16 cas dal 2000/01) e terza la situaziun problematica suenter in divorzi (14 cas). En 7 cas eran arrivads ils pertutgads l'onn passà en las stretgas causa dischoccupaziun, ed er en 7 cas causa ina renta me-mia pitschna. Las ulteriuras 8 famiglias u personas han dovrà agid l'onn passà per autras raschuns.